

**CAROLI ALLIONII
PHIL. ET MED. DOCT.
TAURINENSIS E
SOCIETATE...**

Carlo Allioni, Pietro Peyrolery,
Giovanni Brun, ...





CAROLI ALLIONII

PHIL. ET MED.

DOCT. TAURINENSIS

E

**SOCIETATE PHYSICO-BOTANICA
FLORENTINA**

RARIORUM

PEDEMONTII STIRPIUM

SPECIMEN PRIMUM.



AUGUSTÆ TAURINORUM

EXCUDERANT ZAPPATA, ET AVONDUS

IMPRESSORES ARCHIEPISCOPAL. ET ILLUSTRASS. CIVITATIS

M D C C L V.

THE NEW YORK PUBLIC LIBRARY

ASTEN LENOX TILDEN FOUNDATION
1900

1000 1000 1000 1000
1000 1000 1000 1000

THE NEW YORK PUBLIC LIBRARY

ASTEN LENOX TILDEN FOUNDATION
1900

THE NEW YORK PUBLIC LIBRARY

ASTEN LENOX TILDEN FOUNDATION
1900



*A*mdiu inchoatum, absolutum demum Typis
 committo Specimen hoc Botanicum, plu-
 rium, qua in Alpes nostras institui, itine-
 rum fructum. Quamvis autem hoc opusculum leve
 videri possit, utpote quod nonnisi triginta stirpium
 iconem, & descriptionem complectatur, vix cre-
 dibile tamen est, quantum temporis me disti-
 nuerit. Cum enim ageretur de Stirpibus minus
 notis, quarum nonnulla nova mihi videbantur,

(IV)

eos omnes , qui *Alpinas*, aut *Montanas Stirpes*
commemorassent, *Auctores* consulere necessum erat,
 tum etiam *aliarum*, nec *indigenarum sicca spe-*
cimina mihi *comparare*, quorum *utrumque* &
temporis dispendium, & *multam mihi molestiam*
intulit. Adde, si placet, *clinica Medicina curas*
quotidie ingravescentes, tum *alia*, quæ nullo mo-
 do prætermitti poterant, *graviora studia*, quibus
hæc botanici studii aliquo ab hinc tempore pluri-
imum coarctata sunt. Hæc omnia diu prohibuerunt
quominus postremam operi manum citius imponerem.
Utinam vero illud nunc in publicam lucem pro-
diret, quale diuturna consideratio postularet; ab-
 solutum nempe, *numerisque omnibus expletum*, in
 quo nihil esset desiderandum. Video tamen ipse
 quantum illud a perfectione absit, & quam mul-
 ta forte sint reprehensione digna, quorum tamen

ve-

veniam ab optimis Lectoribus facile impetraturum fore confido ob maximam argumenti difficultatem . Norunt enim optimè qui per Alpes itinera aggressi sunt , colligendarum Stirpium causa , quam diversa res sit herbas domi cultas , commodisque in locis nascentes describere , atque Alpinas raptim , non sine multis incommodis , Et saepe cum vita discrimine lectas . Rariorum , quæ mihi alpestres saltus peragranti accurrerunt , Stirpium icones Lectorum oculis subjicere opportunum visum est , earum præsertim , quas vel ab aliis prætermittas , vel non satis accurate delineatas animadverti : quamvis autem minus nitidæ , neque satis affabre concinnatæ nonnullæ videri possint , Botanices tamen peritis satisfactum iri putaverim , eo vel maxime quod singulas stirpes uberiori descriptione prosequutus sim.

Quod ad nomina singulis imposta pertinet , ab ali-

aliquibus profecto reprehensum me iri sentio, quod vetera pleraque retinenda existimaverim, recentiorum novis legibus minime servatis. Consulto id a me actum est, neque reprehensionem hanc timebo, donec videam, quæ Recentiores nomina effingunt, talia evadere, qualia ipsi præcipiunt; dum vero in his nominibus specificis constituendis Botanici dissentiant, & ab unoquoque, pro ut ei lubet, immutantur, liceat mihi vetera usu recepta nomina conservare. Novis interea ubi Stirpibus nomina danda fuerunt, omnem in id diligentiam, industriamque contuli, ut præcipuas descriptæ herbæ differentias includerent; minime tamen optima fore, vel semper futura esse fidenter affirmo.

(VII.)

NOMINA LIBRORUM,
QUI IN HOC OPERE CITANTUR.

AMMANNI JOANNIS *Stirpium rariorum in Imperio Ruthenæ
sponte provenientium icones, & descriptiones.* Petropoli
1739. 4.

ACTA *Medicorum Berolinensium.* Berolini 1718. ad 1731.
Vol. 21. 12.

BAUHINUS GASPAR *Pinax Theatri Botanici.* Basileæ 1671. 4.

EJUSDEM *Prædromus Theatri Botanici.*

BAUHINUS JOANNES *Historia universalis plantarum.* Ebroduni
1650. in fol. 3. Vol.

BARRELIERI JACOBI *Plantæ per Galliam, Hispaniam, & Italiam
observatæ.* Parisiis 1714. fol.

SPICILEGIO BOTANICO di. *Baltassar, e Michele Campi.* in Lucca
1669. 4.

CUPANI *Hortus catholicus.* Neapoli 1696. 4. cum supplemento

EJUSDEM *Supplementum alterum.* Panormi 1697. 4.

CAROLI CLUSII *Rariorum plantarum Historia.* Antvverpiæ 1601.
fol.

EJUS-

(VIII.)

- EJUSDEM *Rariorum aliquot stirpium per Pannoniam, Austriam, & vicinas Provincias observatarum Historia*. Antvverpiæ 1583. 8.
- COLUMNA *Ecephrasis Stirpium minus cognitarum pars 1. , & 11.* Romæ 1616. 4.
- DILLENII *hortus Eelthamensis*. Londini 1732. fol. maximo vol. 11.
- EJUSDEM Jo. Raji *Synopsis methodica Stirpium Britannicarum a Dillenio emendata, & aucta*. Londini 1724. 8.
- REMBERTI DODONÆI *Stirpium historia Pemptades vi.* Antvverpiæ 1616. fol.
- JO. GEORGHII GMELINI *Flora sibirica*. Petropoli 4. Tom. 1. 1747.
- HORTUS REGIUS *Parisiensis*. Parisiis 1665. fol.
- ALBERTI HALLER *Enumeratio methodica Stirpium Helvetiæ indigenarum*. Gottingæ 1742. fol. vol. 11.
- EJUSDEM *Iter helveticum anni 1739.* Gottingæ 1740. 4.
- EJUSDEM *Opuscula Botanica*. Gottingæ 1749. 12.
- HOFFMANNI MAURITII *Deliciæ hortenſes, & silveſtres*. Altdorffii 1662. 4.
- DIONISII JONCQUET *Hortus*. Parisiis 1659. 4.
- CAROLI LINNÆI *Fundamenta Botanica*. Amstelodami 1735. 12.
- EJUS-

(IX)

- EJUSDEM *Flora Lapponica*. Amstelodami 1737. 8.
- EJUSDEM *Genera plantarum, earumque characteres*. Parisiis 1743. 8.
- EJUSDEM *Flora Svecica*. Stockolmiæ. 1745. 8.
- EJUSDEM *Iter Oelandicum, & Gotlandicum*. Stockolmiæ 1745. 8.
- EJUSDEM *Ananitates Academicæ*. Holmiæ, & Lipsiæ 1749. 8.
- EJUSDEM *Philosophia Botanica*. Stockolmiæ 1751. 8.
- EJUSDEM *Sistema naturæ*. Sexta editio Halensis.
- MENTZELII *Index nominum Plantarum multilinguis*. Berolini 1682. fol.
- PETRI ANTONII MICHELII *Hortus Florentinus a Jo. Targionio Tozzettio editus*. Florentiæ 1748. fol.
- ROBERTI MORISON *Historia plantarum universalis Oxoniensis pars* 2., & 3.. Oxonii 1680. 1699. edita fol.
- JULII PONTEDERÆ *Compendium Tabularum Botanicarum*. Patavii 1718. 4.
- JO. RAJI *Historia Plantarum generalis*. Londini Tom. 3. fol. 1686. 1688.
- RAJI SILLOGE *Stirpium Europæarum extra Britannias nascentium*. Londini 1694. 8.
- JO. FRANCISCI SEGUIERII *Plantæ Veronenses &c.. Veronæ Typis Seminarii* 1745. 8. vol. 11.

EJUS-

(X)

EJUSDEM *Supplementum*. Veronæ 1754. 8.

SCHOLA BOTANICA. Amstelodami 1689. 12.

JO. JACOBI SCHEUCHZERI *Itinera alpina*. Londini 1708. 4.
vol. 11.

JOSEPHI PITTON TOURNEFORT *Institutiones rei herbariæ*. Parisiis 1719. 4. vol. 3.

JO. BAPTISTÆ TRIUMFETTI *Observationes de ortu, & vegetazione Plantarum*. Romæ 1686. 4.



ALYS-



ALYSSON, PYRENAICUM, PERENNE;
MINIMUM, FOLIIS TRIFIDIS Tourn. *Inst.* 217.

TAB. I. NON VI.



Uic, quæ prima hic describenda occurrit, stirpi Tournefortii nomen adscribitur, eo quod nulla alia cognita sit usque nunc Alyssi species, in qua memoratæ a Tournefortio notæ contineantur. Inhabitat hæc summos scopulos altissimarum alpium montis *Cenisii*, uti etiam alpium *Affiette*, *Le-Vallon*, & *La-Croix*, in reliquis, quas invisi, alpibus de cætero rara.

Ex radice duriuscula, & inter scopulorum rimas penetrante cespites varii prodeunt; dense autem congesta folia rosulas constituunt. Folia tridigita sunt, seu in tres lobos linearitruncatos, ad basim fere secta. Succulenta non sunt, sed exsucca, & nitentia: ex horum medio natus pediculus uncialis, aut semuncialis, nudus, aliquot flores sustinet umbellatos brevibus insidentes petiolis, aliquantulum odoratos, sat magnos pro plantæ ratione, purpurei, aut cinereo-purpurei coloris. Corolla patens est, unguis petalorum calicis altitudinem metiuntur.

Calix erectus est e quatuor foliolis concavis compositus, qui diu persistit, tandem caducus. Sequitur silicula compressa, acute ovalis, nihil emarginata dissepimento obverse ovato valvis parallelo, cum permanente spinula. Silicula ad se-

A

mi-

minum situm modice tumet semen utrinque unum maturans; cum tamen in Embrione duo utrinque sint,

Fructu compresso utrinque modice tumenti, & loculo utrinque dispermo Clypeolæ accedit, sed ab ea differt fructu non rotundo, nec emarginato. Jungi cum Draba, & Alyssonequit propter seminum paucitatem; cognitæ enim species polyspermæ sunt sex ad minus utrinque semina includentes. Cum Draba interim convenit fructu oblongo in acumen terminato. Intermedia igitur est hæc stirps Drabæ, & Clypeolæ constitutis generibus. Ego interim Alyssi inter species servavi nomen Tournefortii retinens, cum videam maximam in his novis generibus specierum affinitatem, & notis generum characteristicis traditis haud ita bene species respondere.



AB-

ABSINTHIUM ALPINUM SPICATUM, FOLIIS PETIOLATIS BIS TRIFIDIS, CAULINIS PINNATIS.

TAB. I.

PRIMA hic describitur Absinthii alpini species apud nostrates alpicolas *Genepi* dicta, stirps jamdudum Botanicis nota, sed maxime confusa. Qui varia ejus Synonyma collegit Doctissimus Hallerus (a), vocavit *Artemisiam ex alis floridam*, *foliis petiolatis palmatis*, *planis*, *argenteo*, *sericeis* (b). *Absinthium quidem pumilum*, *palmatum*, *minus*, *argenteo*, *sericeoque folio* Barrelieri (c); & Bocconi (d), uti etiam *Absinthium alpinum*, *incanum* C. B. & *Seriphium montanum candidum* Scheuchzeri (e) ex loco natali (f) ad describendum *Absinthium* spectant. Non ita certo statui potest de *Absinthio pumilo* I. B. (g) & *Absinthio umbellifero*, *mutellina* quibusdam, ejusdem (h).

Absinthium alpinum secundum Ponaë (i) quantum ex icone conjectari licet, non ad hoc, sed ad *Absinthium* tertio loco recensendum potius pertinet. Demum *Artemisia foliis pinnatis*, *ramis ascendentibus hirsutis*, *floribus globosis pendulis*, *receptaculo*

A 2

(a) *Enum. helv.* p. 695.

(b) Licet certæ notæ non adsint Abrotani, Artemisiz, & Absinthii genera distinguendi, antiquissima hæc genera confundere, & uno nomine Artemisiz uti cum mihi non placeat, eo quod hæc genera habitu quodam externo satis distinguantur, Absinthium non Artemisiam vocavi; & præterea Hallerianum nomen hoc Absinthium alpinum ab aliis bene non fecernit.

(c) *Lc.* 462.

(d) *P.* 1. p. 81. T. 71.

(e) *It. alp.* p. 29. *Tab.* 3. *fig.* 1., & p. 328.

(f) Descriptio enim Scheuchzeri ita brevis, & icon, & stirps ita male expressa ut non liceat eruere, num de hoc Absinthio cogitaverit.

(g) *De Absinthio* p. 75.

(h) *Hist.* iii. p. 185.

(i) *Monte Baldo* p. 218.

4
culo papposo Linnæi (1), seu *Artemisia caulibus simplicissimis*; foliis pinnatis, laciniis linearibus parallelis, floribus solitariis (m) ejusdem diversa est a nostro Absinthio.

Est huic Absinthio alpino radix dura lignosa: caules ad summum Spithamæi, vix tomentosi. Folia radicalia plura, compressa, sericeo villo nitentia, non tomentosa, duplicato trifida, laciniis linearibus, sine nunc acuto, nunc obrufusculo. Caulina folia pinnata pinnis indivisis, summa sessilia; ex horum alis longa serie nascuntur pediculi ex bombacina hirsutie incani, flores solitarios sustinentes. Flores magni sunt, aurei. Calix amplus, calycis squammæ virides ora nigra, intus citrini coloris. Calix qua parte pediculo jungitur tomentosus: receptaculum nudum. Humiliora specimina magis tomentosa sunt.

Reperi copiose in horrido abrupto supercilio altissimi col-
lis supra Jaillon. In Augustæ Prætorix alpebus etiam nascitur,
similibus locis.

AB¹



(1) It. Gortl. jul. 12. cum fig., & H. Upf. p. 218.
(m) Ad Stockolm. 1741. p. 205.

5

ABSINTHIUM ALPINUM; CANDIDUM;
HUMILE C. B. pr. 71.

TAB. I.

ALTERA hæc est *Genepl* species, quæ in editissimis jugis alpium Valdensium potissime frequentissima est, & a reliquis Absinthiiis alpinis discrepat, floribus majoribus, aureis, umbellatis, quod discrimen primus adnotavit doctissimus Hallerus (a). Nomen ei sequens indidit *Artemisia floribus umbellatis foliis petiolatis palmatis, sericeis* asseverans esse certo *Absinthium alpinum, candidum, humile* C. B. a Burfero lectum in M. Gletschberg Valleflorum.

Eo quod nulla usque nunc exhibita stirpis hujus figura sit, idcirco delineandam, & incidendam curavimus, & brevi, nervosæque Halleri descriptioni pauca superaddam, quæ raram alibi hanc stirpem magis definiant. Folia pinnata sunt, ut ait Hallerus, pinnis ad duo, & tria paria palmatis, & hæc pinnæ sæpius quinquefidæ, interdum quadrifidæ sunt laciniis angustis, & acutis. Folia caulina, quæ rara sunt, non differunt nisi paucioribus laciniis, de cætero etiam petiolata sunt. Caules incani, spithamæi quando altiores, & aliquando ita breves ut vix biunciales sint.

Dixi oriri abunde in *vallibus Valdensibus*; adinvenitur etiam in Monte *Cenisio*, in *valle Lanii*, *Augustæ Prætorie*, aliisque alpiibus, sed parcius.

AB-

(a) L. c. p. 694.

**ABSINTHIUM FOLIIS RADICALIBUS
MULTOTIES PINNATIS; CAULINIS
PINNATIS, LONGE PETIOLATIS;
FLORIBUS PARVIS, RARIS
SESSILIBUS.**

TAB. II.

TERTIA hæc Absinthii species a primo discrepat foliorum radicalium pinnis tenuioribus, & floribus sessilibus non petiolatis; a secundo floribus minime umbellatis, ut alia omittam discrimina ex ejus descriptione petenda.

Folia sericea habet tenuius, quam in præcedenti divisa segmentis angustioribus, & longioribus. Folia nempe, quæ etiam longe petiolata sunt, pinnis componuntur sæpius ad tria paria, & pinnulæ iterum incisæ sæpe sunt, & corniculatæ. Caulina folia similiter longe petiolata, & pinnis ad duo, aut tria paria pinnatis, pinnis rarissime non simplicibus; in alis foliorum residet sessile floris capitulum simile flori Absinthii *alpini spicati* (a) &c., sed multo minus. Sericeo incana tota stirps est cauliculis tenuibus, & semipalmatis.

In monte *Cenisio* ad scopulos infra prata *Los-Laros* collegi hoc Absinthium, de quo nil apud auctores scriptum video. *Absinthii secundi Pona* icon nostrum hoc videtur exprimere.

Absinthia alpina apud Alpinas Gentes ubique *Genepi* dicuntur, & iis utuntur ad multos morbos; egregie, & potenter sudores cient, iisque Medici nostrates cum successu utuntur iis in morbis, in quibus e re est vehementia sudorifera adhibere.

VIO-

(a) *P. T. 1. f. 2.*

VIOLA ALPINA MINIMA
NUMMOLARIÆ FOLIO.

Bocc. mus. p. 2. p. 163. Raji. hist. tom. 3. p. 510.

Viola alpina nummulariæ folio Bocc. mus.

p. 2. Tab. 127.

TAB. II.

VIOLA, cujus historiam, & descriptionem aggredior, nascitur inter diffractos lapides summi, & editissimi jugi *Col de la Fema morta*, per quod ex alpinis Valderianis ad Niciensem comitatum via est. Eam ibi collegi anno 1752. cum præcipites, sæpe abruptos, planeque horridos illius montis scopulos non sine vitæ discrimine perlustrarem. Sola etenim inter saxa & nivem inhabitat montis verticem reliquis stirpibus plane desertum.

Quamvis brevis admodum sit Bocconi descriptio, & rudis, quam exhibet icon, utramque tamen cum mea Viola conferens eas reperio notas, quibus comprobetur revera hanc illam Violam esse, cujus Bocconus meminit. Magnitudo totius plantæ siquidem, foliorum forma, quæ revera inter nummularium, & alfinem est, floris demum color a Boccono adnotatus satis bene respondent; sed quod evidentius argumentum præstat, est stipularum in hac Viola forma, & positio, quæ non obscure ex icone Bocconi colligitur. Verum quidem est Bocconi Violam ex montibus Corsicæ, meam ex Valderianis natales suos trahere; at quis ignorat alpium etsi sub diversissimo cælo positarum simile ingenium esse, & easdem in utrisque stirpes crescere. Diserte admodum, & egregie hac de re loquitur Clar. Linnæus (a) observans maximam par-

(a) *Proleg. ad floram Lapponicam* a §. 7. ad 15.

partem stirpium Alpium Lapponicarum; etiam in Helveticis Alpibus reperiri, imo in Monte *Ararat* stirpes crescere, quæ in Alpibus Lapponicis etiam nascuntur: quid plura? Non paucas ipse Bocconus enumerat stirpes, quæ & in Corsicæ montibus, & in Sabaudicis Alpibus crescere animadverterat. Verum ad ejus descriptionem veniamus.

Radix filiformis duriuscula, & subpurpurei coloris varios plerumque mittit caules, primum subrubentes, dein virides, seu potius varia mittit capita in cauliculos abeuntia. Cauliculi erecti sunt, nunc ramosi, nunc minime; toti fere squamis tecti, quæ stipulæ sunt aut novorum, aut veterum foliorum; ex alis stipularum copiosa oriuntur folia cordato-acuminata, quæ semuncialibus insistent pediculis. Folia duriuscula sunt, tantillum venosa, glabra, nihil omnino in ambitu denticulata, sed integerrima. Inter folia ex iisdem alis pedunculi floriferi pediculis foliosis altiores. Flos non magnus ut in *Viola grandiflora*, nec minimus, sed æqualis fere cum *Viola martia* amplitudinis; color floris cæruleus cum nigris radiis: trium inferiorum petalorum unguis albicant. Nectarium breve: floris odor vix aliquis. Ad singulos pediculos hæret stipula, quæ foliolum est lineari-tridentatum, dente medio longiori. Fructum maturum non vidi. Tubæ apicem crassum, & perforatum memini observasse.

Nullam Auctores Botánicos diligenter evolvens *Violam* inveniri, quæ ad hanc referri possit. Notas, quibus a reliquis discriminatur, constituunt, folia omnia cordato-acuminata integerrima, stipulæ tridentatæ, & ramosus, seu caulescens, licet humilis, plantæ habitus. Ex hisce omnibus perspicuum erit neutrquam confundi posse cum *Viola palustri rotundi-folia glabra* Morisoni (b), quæ ab Hallero (c) *Viola acaulis foliis reniformibus* appellatur. Qui nostram cum ea conferet, jam aperissime diversam esse concedet.

ACHIL.

(b) *Hist. Oxoniens. Tom. 11. p. 475.*

(c) *Enum. fl. helvet. p. 591.*

9

ACHILLEA FOLIIS PINNATIS , LANUGINE
TOTIS OBDUCTIS , FLORIBUS ALBIS
UMBELLATIS . Hall. En. helv. pag. 713.

T A B. II.

EX radice repente subnigra , & fere lignosa oriuntur cauliculi quandoque plures , quandoque unus , quorum altitudo palmum non excedit. Folia ad radicem plurima , eaque ex longo plano petiolo elliptico-oblonga forma figurata. Caulina similia sunt , sed breviori nituntur petiolo , ita ut summa sessilia sint . Omnia pinnata , & pinnae exhibent nunc lineares indivisas , nunc trilobas , aut tribus dentibus profunde sectas . Maximopere tomentosa stirps est tam denso villo prædita , ut sub illo pinnæ , & earum dentes ferme occultentur . Idcirco , quo foliorum figura , & pinnarum varia compositio pateret , duo foliola distincte delineari volumus . Cauliculos umbella terminat , quæ sit ab octo persæpe floribus semunciali pedunculo gaudentibus . Calycem floris componunt plurimum squammæ , quarum exteriores tomentosæ . Omnes pallide virent oram habentes nigram , cristatam , seu potius simbratam ; semisflosculi octo , vel decem , albi , ad limbum incisî , fere quadranguli ; flosculi lutei viginti circiter ; semina sequuntur tetragona nuda fusci coloris : flosculis , & semisflosculis interjacent squammæ memoratis calycinis similes , unde receptaculum paleaceum .

Primus omnium hujus herbæ meminit Fœlix Platerus , ex quo habuit Joannes Bauhinus , & appellavit *Millefolium alpinum* , *incanum flore specioso* (a) . Sub hoc nomine etiam indicarunt Robertus Morison (b) , Rajus (c) , Tournefortius

B

(d) ,

(a) *Hist. pl. iii. pag. 148.*

(b) *Ox. iii. pag. 39. T. xi. f. 2.*

(c) *Hist. pl. 347. & Syll. ext. p. 182.*

(d), & Joannes Jacobus Scheuchzerus (e). Sub eadem etiam appellatione venit in Chabræi Sciagraphia cum eadem prorsus icone, & descriptione. Bocconus eam diverse indicavit sequentibus nominibus *Millesfolium alpinum tomentosum, odoratum nanum* (f), *millesfolium tomentosum odoratum* (g), *Millesfolium alpinum, humile, incanum, odoratum flore albo* (h). Prima duo Bocconi Synonima etiam enumerat Joannes Jacobus Scheuchzerus, sed Bocconus nullum de Bauhini nomine verbum facit.

Si descriptio excipiat, qua Hallerus stirpem hanc illustravit, nihil boni eruere licet sive icones, sive descriptiones consulantur. His de rationibus confido plenior, quam dedi, ejus historiam acceptam futuram esse.

In Valesiæ Montibus suam invenit Fœlix Platerus, Scheuchzerus in altissimis Aversanis, & Prægalliensibus jugis, nec non in Furcæ altissimi Montis boreali parte. Ibi etiam lecta fuit a Præcl. Hallero; Bocconus utriusque Montis Cenisii indigenam facit, sed copiosius adhuc nascitur ubique in summis scopulosis, & nivosis Alpium Cottiarum jugis. Alpicolæ Montis Cenisii cum *Genepi* confundunt, & herbam *della rotta* etiam vocant, quod etiam jam suo tempore adnotaverat Bocconus (i). Cæteri alpicolæ distinguunt *Herbam della rotta*, & *Genepi*, sed *Genepi* nomen neque unam eandemque *Abinthii alpini* speciem perpetuo significat; hæc *Herba della rotta* longe differt ab ea, quam Matthiolo indicavit Cortusus, & post J. Bauhinum Chabræus in sua sciagraphia recensuit, & hoc quidem de discrimine jam dubitaverat Bocconus (l). Hujus *Herbæ della rotta* integra, & absoluta descriptio infra tradetur.

Aro-

(d) *Inst. p. 496.*

(e) *It. 2. p. 138. in isinera vero iv. p. 338.*

(f) *Mus. pl. p. 166.*

(g) *L. c. Tab. 120.*

(h) *Mus. di sper. pag. 191.*

(i) *Mus. pl. p. 166.*

(l) *Mus. di sper. pag. 191.*

11

Aromatica stirps est hæc Achillea gustu acri, & amaro; magnæ est æstimationis apud omnes Alpicolas. Utuntur ea sicuti *Genepi* ad sudorem pellendum, ad ventriculi & abdominis dolores, quos non raro afferunt gelidæ nivales aquæ, quas bibunt. Nulla domus ea caret, & ipsis est tamquam medicina quædam universalis.



B 2

ACHIL-

ACHILLEA FOLIIS INTEGRIS, ODORATIS,
CUNEIFORMIBUS, IN APICE
DENTATIS.

TAB. II.

PAUCI Botanici eam viderunt Achilleam, quam nunc describendam suscipio. Olim Antonius Cortusus hanc Achilleæ speciem ad Matthiolum misit (a) *Eupatorium Mesues flore albo*, vocans, eique significavit *Herba rotta* in Pedemontio, alibi que vocari, & multam nasci in Valle di Lanze, & in Valle Sanctæ fidei Patavinorum. Joannes postea Bauhinus (b) a Valerando Dourez plantam hanc cum descriptione acceptam commemorans, Dourez descriptioni ea addidit, quæ Antonius Cortusus ad Matthiolum scripserat. In Chabræi Sciagraphia (c) icon, & descriptio Bauhiniana repetuntur. Robertus Morison. (d) appellat *Ageratum Alpinum latiore, & rotundiore folio*. Rajus Joannis Bauhini descriptionem (e) referens monet propter flores radiatos ad Parmicam esse referendam. Neque post hos Botanicos ulla amplius facta hujus herbæ mentio est.

Ex radice lignosa, nigra, varie inflexa, cespitis instar caules oriuntur spithamam circiter alti, filiformes, rotundi, virides, ad quorum radices folia plura congeruntur, in caule cæterum rara. Crassula, succosa, glabra, cuneiformia, sessilia sunt, ex angusto principio sensim in subrotundam formam ampliata. Foliorum apex in primis foliis septem dentatus; quinque dentatus vero in secundis; in summis tridentatus, aut etiam integer.

Cau-

(a) In Epistola edita in Commentariis Matthioli post Auctoris prefationem.

(b) Hist. iii. p. 1. p. 144.

(c) P. 368.

(d) Ox. 42.

(e) Hist. 364.

Caulis terminatur corymbo florum, seu radiis sex, aut novem, aliquando etiam paucioribus, subincanis, uncialis, aut semuncialis longitudinis, quorum quilibet fert florem unum, rarissime duos. Calix cylindricus potius est, quam hemisphaericus, ab inæqualibus, viridibus, imbricatis squammis constitutus. Semiflosculi ovato - quadranguli, albi, octo plerumque, nunc uno, nunc duobus dentibus incisi cum tuba bicorni. Flosculi autem albi etiam sunt a 16. ad 20., quinque partiti, eorumdemque stamina quinque sustinent antheras luteas coalitas, quibus interjacet tuba bicornis, lutea, flosculis altior. Thalamus floris paleaceus est.

Placuit Achilleam, non Ptarmicam, vocare, Clarissimorum in re Botanica Virorum vestigiis insistendo, qui Millefolii, & *Ptarmica* genus conjunxerunt; nulla enim suppetit nota hæc duo genera distinguendi sive folia, sive calycem spectemus; a quibus unice peti posset. *Achillea* ex. gr. *foliis pinnatis, lanugine totis obductis, floribus albis umbellatis* Hall. calycem habet hemisphaericum, folia vero millefolii æmula, & inter millefolia recensuit Tournefortius. Quæ vero eidem Auctori *Ptarmica alpina, tanacetii folio, fl. purpureo est*, calycem ostendit cylindricum; in *Ptarmica* demum *alpina matricariæ folio* Triumf. obs. 88. calycem conico cylindricum esse animadverti; unde patet optimo omnino jure *Ptarmicæ*, & *Millefolii* genera in unum reduci.

Oritur in locis siccis, & saxosis secus torrentes in Valle Lantii, uti quoque in Alpibus Valderianis, & Vinadiensibus, ubi maximi habetur pretii ad omnes morbos. Vehementem aromaticum odorem tenet, qui omnino exhibet odorem *Balsamitæ minoris* Dod. pempt. 195. ejusq. vires habere observatio docet.

VIOLA FOLIIS OVALIBUS, INTEGERRIMIS;
UNIFORMIBUS, PEDUNCULIS
CAULINIS.

TAB. III.

EODEM prorsus loco, quo *Campanula plerumque multicaulis*, *uniflora*, *foliis ovatis sessilibus integerrimis*, collecta & est hæc *Violæ* species, quæ radicem habet longissime inter diffractorum scopulorum lapides repente, & varia deinfundentem capita, ad quæ multa nascuntur folia ovalia, tenera, succosa, glabra, minime venosa, obscure virentia, & longe petiolata. Hæc folia cauliculum sine ordine exornant uncialis ad summum altitudinis, qui deinde in summo producit ex alis foliorum duo, sed frequentius unum pediculum uncialis longitudinis cum flore magno nitide purpureo; *Viola montana cærulea grandiflora* H. R. Par. adinstar, sed paulo majoris & obscurioris coloris. *Calyx*, *flos*, *tuba* nihil differunt, & nisi folia diversitatem ostenderent, eandem diceres.

Folia tenera cum sint, ad ambitum uno, alterove loco nonnunquam erosa sunt, ut crenas mentiantur; videant ideo Botanici num ad nostram sit deducenda *Viola petræa*, *busambarenfis*, *crassulo*, *crenato ocymi folio flore majore inodoro cæruleo venis candidis distincto* Cupani (a).

Viola acaulos flore foliis multo majore Hall. en. 502. diversa a nostra est foliis solidioribus, & dentatis.

SE-

(a) Hort. catb. 239.

SEDUM ERECTUM, RAMOSUM, FOLIIS
PLANIS, FLORIBUS ALBIS LONGE
PEDUNCULATIS.

TAB. III.

RARISSIMAM exhibeo Sedi speciem, de qua nullam plane notitiam apud rei Herbariæ Scriptores reperire datum est.

Cauliculus ei tenuis, filiformis, erectus, ramis hinc inde & sine ordine diffusis; folia ad ramificationes potissimum apponuntur fere sessilia, tenera, succosa, venosa sunt, & veluti ex adpersa pruina *Mesembryanthemi*, *chrySTALLINI plantaginis folio undulato* (a), adinstar pulchre nitentia. Foliorum forma ex elliptico acuminata, sed hæc forma quidem in primis & secundis potissimum se se monstrat; nam postrema admodum variant nunc angusta, nunc fere rotunda. Rami singuli in tenuissimos pedunculos abeunt semuncialis, aut etiam uncialis longitudinis, qui florem sustinent album pentapetalum, calyce quinquefolio exceptum. Corolla patens est, & calyce amplior. Petala elliptica sunt, paullisper acutiora, quam icone repræsentetur, extus levissime virent cum in interiori facie albissima sint; stamina decem sunt, alternis brevioribus, & circumdatur ab iis ovarium, quod ex quinque coalitis vaginulis fit. De fructu, & semine nihil licet addere, quoniam maturitatem semina nondum cæperant, quo tempore stirpem hanc collegi, quæ nullibi deinceps obvia fuit, nec illius loci denuo invisendi se se postmodum obtulit occasio. Eam reperi anno 1746. sub initium Augusti mensis in Valle Valdenses S. Martini secus viam, quæ ab oppido *Le perré* ducit ad

(a) *Dill. Hort. Elrb.*

ad oppidum *Pralles*. Viam ibi importuni impediunt ingentes lapides ex altissimis proximis rupibus decidui, sub quorum concamerationibus se se abscondit.

Quandoquidem Sedi hujus folia aliquomodo ad *Lentis* fructus figuram accedunt, dubitare aliquis posset, num de hoc Sedo intellexerit Mauritius Hoffmannus, qui *Aizoi*, seu *Sempervivi* speciem ex Monte Baldo sequenti nomine describit. *Aizoum*, sive *Sempervivum alpinum M. Baldi fol. lenticulatis flor. non punctatis* (b). Hujusce Sedi, quod Baldi Montis indigenum facit Mauritius Hoffmannus, nulla plane cognitio ab iis, qui Veronenses stirpes descripserunt, eruitur; & præclarissimus, amicissimusque vir Joannes Franciscus Seguiet, qui Veronensem agrum, montemque præcipue Baldum diligentissime perquisivit, doctissimeque illustravit; cum eum de Sedo hoc Mauriti Hoffmanni per literas interpellassem, certior me fecit nulum sibi adhuc Sedum occurrisset, quod cum memorato conveniret. A clar. Hoffmanno recensitum Sedum minime filuit Christianus Mentzelius, sed Hoffmanni nomen repetens *albis floribus* esse superaddit (c).

Quod pluribus stirpibus, & nonnullis etiam Sedi speciebus contingit, ut foliorum color per ætatem ex viridi in rubrum colorem degeneret, id mihi domum, itinere absoluto, postmodum repetenti in Sedo hoc contigit observare; & si ruber color acidum indicat quemadmodum a doctissimo Linnæo (*fund. bot.* 364., *Syst. nat. editio Lipsf. anni 1748.* p. 218., *Phil. bot.* 286.) affirmatur; optimo jure conjicere licebit communes cum hoc Sedo eas omnes virtutes esse, quas habent non paucae Sedi species, quæ acido sapore donantur.

SA-

(b) *Desl. Flor.*

(c) *Ind. Univ.*

**SAXIFRAGA FOLIIS PALMATIS,
CAULE DENSE FOLIOSO, ET
FLORIGERO.**

TAB. III.

AUCTORES, qui de re Botanica scripserunt, quotquot habere potui, diligenter evolvens nullum ab iis fieri verbum video de hac Saxifraga, cujus locus natalis est Alpibus *Albergian* in quodam humido, & scopuloso recessu.

Villosa, & viscosa in universum est; folia ad radicem multa in orbem congesta, crassa, profunde, & obtuse quinque-dentata. Caulis vix digitalis, foliosus, foliis longe petiolatis, profunde; & inæqualiter aut quinque, aut tribus etiam dentibus sectis. Ex alis pedunculi foliosi nunc simplices, nunc ramosi, flore albo singulis ramis insidente. Folia floralia ad ortum florum posita integerrima: ovarium sub flore est, maturum non vidi.

A notis huc usque Saxifragis, ut existimo, discriminatur caulibus dense foliosis, & florigeris. *Saxifraga foliis brevibus palmatis densissime congestis* Hall. (a) humilior est, flores habet potius umbellatos petiolis unifloris, præterea nullam nec villositatem, neque visciditatem ostendit. *Saxifraga tridactylites groëlandica*, cauliculis valde foliosis Dill. (b) folia triloba habet cauli appressa cauliculis, postquam nudi facti sunt, umbellas florum sustinentibus. *Saxifraga* demum foliis omnibus

C


an-

(a) *Enum. belv.* 404.

(b) *Elisb.* p. 337. T. 253. f. 329.

angustis, petiolatis in apice tridentatis; Caule folioso; ramoso; viscido (c) à nostra discrepat foliis longe petiolatis, profunde trifidis & ramis nudis.

Pleræque alpinæ Auctorum Saxifragæ nostris etiam in Alpibus reperiuntur; duas alias teneo plane novas, & alio opere, si Deo placuerit, describendas cum aliis non paucis novissimis nostratibus stirpibus.



VE-

(c) Hall. l. c.

VERONICA CAULE SIMPLICI,
FLORIBUS CONGESTIS TERMINATO,
FOLIIS OVATO-ACUTIS,
DENTATIS.

TAB. III.

FIRMIS, duriusculis cauliculis se se erigit Veronica hæc, quam in saxosis summæ Alpīs *Albergiam* dictæ supra oppidum Fænestrellarum positæ adinvenimus. Cauliculi rotundi sunt digitalis altitudinis, tria plerumque ex opposito nascentium foliorum paria habentes, folia sessilia sunt, erecta, ovato-acuta, quinque aut sex dentium paribus. In superiori facie ferme glabra sunt, in averſa rugosa, nihil hirsuta; flores in spicam laxam breviorē congesti, capsula cordato-ovalis cum multo semine.

Non video ab Auctoribus Botanicis commemoratam hanc Veronicam, nisi aliqua ex Michelianis num. 10. 11. 12. (a) recensitis ad hanc sit referenda. Procul dubio diversa est a *Veronica, caule non ramoso, floribus congestis terminato, foliis ovatis pene glabris* Hall. (b), foliis non crenatis, firmioribus, sed dentatis, & in averſa parte rugosis. Folia deinde in *Veronica* memorata Halleri licet


C 2

mul-

(a) *Mich. H. flor. p. 99.*

(b) *Enum. p. 53., Tab. xii. f. 2.*

multum variant (c), non tamen eam formam ovato-acutam acquirunt. Præterea Veronica illa sæpius cauliculos habet inflexos, & resupinos; hæc recta firme se se erigit.



VE-

- (c) Mirum dictu, quantum variet hæc Veronica: nunc folia sensim decreseunt, ut superiora lineari elliptica sint; nunc æquali fere magnitudine progrediuntur; nunc contraria omnino ratione prima cum parva sint, quæ sequuntur majora sunt, postremo florum capitulo supposito, omnium maximo. Foliorum crenæ quoad numerum etiam inconstantes, & in quibusdam speciminibus fere deficiunt. Altitudo incerta est: teneo specimina a semunciali ad digita-

VERONICA REPENS, EX ALIS SPICATA,
FOLIIS ROTUNDIS, FIRMIS,
GLABRIS, DENTICULATIS.

T A B. IV.

HÆc Veronica, cujus nullam distinctam historiam detegere datum est apud Auctores Botanicos, vulgarissima est in Alpibus Pedemontanis. Alpes *Cottiae*, *Valderianae*, *Vindenses*, *Sabaudiae* &c., ubique copiose habent, nec ea desideranda venit in Alpibus etiam Niciensibus. Magnæ æstimationis est apud nos, & antefertur seu *Veronica supina vulgarissima officinarum* C. B., seu *Veronica teucrisii veri* nomine (a) a Berolinensibus Medicis celebratæ.

Duris, rubentibus, nodosis, & lignosis virgis, & sæpe ramosis repit, uti *Veronica supina vulgarissima*, folia opposita nascuntur, firma, dura, utrinque glabra, nitentia, minutissime denticulata; ex nodis, ad quos folia oriuntur, radículas sæpe demittit, quibus firmiter telluri inhæret, & ex summis alis florum densa spica cum pedunculo unciali. Flores in icone male exprimuntur, nec optime in flore, quem sejunctim pingi curavimus. Flos, qui colorem exhibet cæruleo-violaceum, difformis est; segmentum nempe superius ovatum, amplum, minora, & angusta lineari-rotunda lateralialia, cum infimo adhuc angustiori. Fructus sequitur oblongus, cordatus, polyspermus.

Foliis maxime glabris & duris nihil omnino aut strigosius, aut hirsutis differt a *Veronica supina*, & *vulgarissima*. Videntum num ad nostram pertineat *Veronica mas repens pirenaica*, folio longiori, glabro schol. Bot., Plukn. *phitogr. Tab. 233. fig. 1.* Tourn. *inst. 143.*

AN

[a] *Ath. Berolin. Vol. II. n. 5.*

Ar ARETIA GLABRA, OBTUSI-FOLIA;
UMBELLIFERA. Hall. helv. 486.

TAB. IV.

RADICULA est huic Aretiae subfusca, & repens, ex qua foliorum rosulæ plures aliquando, sed sæpius unica. Lingulata folia sunt, elliptica, sine obtuse acuminato, tenera, venosa, dilute virentia, & glabra. Inter hæc, sed non e rosularum centro, scapi exeunt filiformes, variæ altitudinis ab unciali usque ad palmarem altitudinem umbellam florum ferentes, quorum radii, seu pedunculi florigeri, inæquales. Frequentius duo, aut tres sunt, raro plures, & ad ortum pedunculorum stella ex quinque foliolis acutis inæqualibus. Calix floris semiquinquefidus luteo-virescens. Tubus floris cylindricus, brevis segmentis ovatis integerrimis. Antheræ in collo corollæ sitæ. Floris, qui cum umbilico luteo pallide rubet, centrum ut in heliotropio plicatur, plicis glandulas nectariferas occultantibus. Fructus intra calycem maturat rotundus, qui quinque valvis aperitur, & semina nigra, quodammodo reniformia continet.

Flores in hac Aretia constanter fatis nascuntur umbellati; varietas tamen flore singulari mihi se se obtulit in Monte Cenisio ad summas rupes *la Turra*, eaque carebat calyce communi. In jugo etiam editissimo Alpibus *Jaillon* mixtim nascitur utraque Halleri (a) *Aretia villosa*, scapis nempe *unifloris*, & *multifloris*, quæ cum solo numero floris radiorum differant, in reliquis similes, in unam jungi speciem posse existimarem, eo vel maxime quod in duabus etiam aliis Aretiis eandem variationemprehenderim: in *Aretia*, nempe, *foliis linearibus*,

(a) L. 6.

bus, *scapo paucifloro* Halleri (b); quæ varietas jamdudum Botanici nota est; & in altera *Aretia* (c) in summis nostrarum Alpium herbidis jugis frequentissima, & cujus copiam mihi fecit amicus meus singularis D. Gagnebin in summo Pyrenæorum Monte *du Canigou* repertam. Ea omnino accedit *Aretia foliis ciliatis, linearibus, floribus umbellatis* Hall. (d) foliorum durorum obscure virentium rosulis, umbellarum conformatione, floribus, qui purpureo-violacei sunt; sed differt *foliis ne minimum quidem ciliatis*.

Quæ a nobis existimatur esse *Aretia glabra, obtusi-folia, umbellifera* Halleri, multa nascitur in herbidis, nivosis jugis *Du Vallon* supra *cels* in Valle *Exilliarum*, & copiose etiam in utroque Monte *Cenisio*. Dominus *Valle* (e), qui insignis

ex-

(b) L. c.

(c) Raro apud nos occurrit *Aretia foliis linearibus, glabris, scapo paucifloro* Hall.

(d) L. c. num 5. T. 7.

(e) Hujus egregii Viri cum in rem herbariam merita non exigua sint, mihi liceat hic ejus vitam breviter indicare. Fuit is Medicinæ Doctor Taurinensis, qui tum Alpium, tum agri Taurinensis plantas sedulo inquisivit. Cum magna flagraret herbas, & naturalia quæque noscendi cupiditate, avide occasionem arripuit, quæ ipsi se se obtulit Corsicam petendi: anno enim 1747. exercitum nostrum secutus est Medici munere fungens. Quanta diligentia potuit, & quantum per ipsi conceditum officium licuit, herbas, semina, conchilia, insecta, & quæ reliqua sibi obvia erant, collegit. Sibi interim non cavens, & nulli labori parcens sub fervido cœlo, & calidissima tempestate, febri ardente correptus, trium dierum spatium misere e vivis fuit ereptus. Collectio herbaria ad barbaras ignorantium manus post ipsius obitum cum pervenisset, a quibus res inutiles habebatur, pessumdata fuit, ut ne ejusdem quidem frustulum in Pedemontium deveniret. Quæ reliqua reperta domi suæ sunt hic Augustæ Taurinorum seu collectiones, seu manuscripta ab illius heredes coem. Doleo tamen non omnia sua adinveniri potuisse. Collectiones duæ ad manus meas pervenerunt tantummodo; una herbarum quas circa *Savonum* reperit, & raras aliquot continet. Altera illarum stirpium est, quas anno 1744. observaverat, dum Montes, & Alpes *Segusii, Exilliarum, & Fœnestellarum* perstraret. Illarum historiam scripsit juxta Tournefortii methodum distributam, & complectitur omnium, quas repererat, stirpium descriptionem cum loci natalis adnotatione; sed hujus utilis, & operosi laboris libellus unus solum repertus est, quatuor priorum classium herbas, recensens, & describens.

exiitit Taurinensis Botanico eandem Aretiam legit ad dexteram viæ, quæ ex Monte *Vallon de Chaumont* ad alium superiorem ducit *Craye du credenage* appellatum.

Apud Auctores Botanicos Synonima nulla invenio. Hallerus (f) dubitat hanc esse posse *Androsacem perennem, alpinam, angustifoliam, glabram, & multifloram* Tournefortii, quam Tournefortii *Androsacem* ad aliam alibi refert (g) sed memorata a Tournefortio spectare potius videtur ad *Aretiam foliis linearibus glabris, scapo paucifloro* Halleri.

Aretia genus ab Hallero est institutum, qui vidit has androsaces species ab *Androsace* Matthioli differre tubo floris cylindrico, calyce non serrato, & corolla decem glandularum sub origine segmentorum positarum quibus statutis & inter Aretia species locum mereri posse videtur rara quædam plantula, in Helvetia nondum obvia, & in Alpibus, quæ Monte Vesulo, & Monte Ceniso interponuntur longe frequentissima, de qua liceat nonnulla hic subicere.

„ Ex tenui radícula ea oritur, & humi jacens cauliculis re-
 „ prat valde ramosa; rami pene nudi sunt, & rubent; ad ra-
 „ morum divisionem densus est floccus foliorum, quæ lanceata
 „ sunt, sessilia, ex viridi cinerea, brevissime hirsutula, uncia
 „ Parisiensis trientem longa, dimidiæ lineæ latitudine in am-
 „ pliori parte. Inter folia ad ramorum originem unus, aut al-
 „ ter oritur pedunculatus flos magnus, Luteus *Jasmini Lutei*
 „ vulgo dicti bacciferi C. B. fere forma, & amplitudine. Infun-
 „ dibuliformis flos est, limbo in quinque lacinias lineari-elli-
 „ pticas, crenulatas, scepius inflexas, secto: ad singularum Laci-
 „ niarum originem squammula, & sub ea glandulæ nectariferæ

oc-

(f) L. c.

(g) It. helv. 1739. xxxix. Refert nimirum ad *sedum alpinum alterum lacteo flore pannonicum* Clus. *pannon.* p. 439. 490., h. e. ad *Aresiam villosam*; nec aliter habet in nova opusculorum suorum Botanicorum editione, quæ prodit Gottingæ anno 1749.

„occultantur. Antheræ quinque cum filamentis brevissimis ad
 „collum corollæ fixæ, erectæ, conniventes. Stylus tubo floris
 „longior: stigma rotundum. Calix tubo floris paulo brevior,
 „erectus in quinque longa lineari-acuminata segmenta divisus.
 „Fructus intra calycem maturat, qui sit capsula globoso-acu-
 „minata, calyce non omnino tecta, semina nigra pauca, ma-
 „gna, ex una parte striata, altera concava continens.

Hanc stirpem primus descripsit Fabius Columna (h) *Sedi alpini F. Gregorii Regiensis* nomine. Deinde vero eandem Tournefortius (i) recenset (l) vocans *Auriculam urfi alpinam, gramineo folio, Jasmini Lutei flore*, quo nomine sed vitiatum (m) enumerat Tilli in Horto Pisano.

Novum tandem ex hac stirpe (n) genus constituit Leonardus Sesler (o) a celeberrimi viri, nunc in Universitate nostra Botanices Professoris, nomine *Vitaliana* dicta, appellaturque ei *Vitaliana, perennis, repens, foliis oblongis, integris, angustis, acutis, caule laxo ramoso, floribus magnis solitariis luteis, petalis inflexis*. Columnæ synonymum addit hic Auctor, nil vero innuit de Tournefortii nomine, quod ad hanc plantam pertinere adnotavit Vir naturalis Historiæ maxime gnarus Josephus Monti Bononiensis Botanices Professor in novissima (p) quam fecit suorum indicum editione.

D

Vi-

(h) *Ecpbr. p. alt. p.* 63.

(i) *Inst.* 122.

(l) Ita specificè *gramineo folio, & flore Jasmini Lutei* indicatur stirps hæc, ut pro certo haberi possit de hac, & nulla alia Tournefortium intellexisse.

(m) Ibi legitur *Auricula urfi, alpina gramineo folio, Jasmini odore, flore luteo* Tourn.

(n) *Agg. al saggio della storia natur. del mar. adriat. del signor Vitaliano Donati* pag. 71.

(o) Diu dubitavi num Leonardi Sesler stirps eadem omnino cum nostra esset, sed emnem dubitationem sustulit in re Botanica maxime versatus Julius Cæsar Moreni Pharmacopeus Veronenfis, qui *Vitaliane* siccum specimen misit, quo certior hac de re factus sum, & omnis mea sublata est dubitatio.

(p) *Indices Botanici, & materie medica &c. Bononia 1753. quarto p.* 74.

Videant Botanici, num *sedum montanum*, *perpusillum luteolis floribus* Parkinsf. (q), & *Primula flore subsessili foliis linearibus* Linn. (r) ad nostram stirpem pertineant.

Dixi sub *Aretia* genere posse comprehendere, ita etiam existimat Illustris D. Gagnebin, qui præterito anno hujus stirpis exemplar ad me misit a se collectum anno 1730. in summis Alpibus Embroduni in monte quodam Abbatia de *Bo-scodon*, & missæ stirpi sequens nomen fecit *Aretia cauliculis teretibus, foliis linearibus villosis, floribus magnis luteis, sessilibus, fere umbellatis*.



LE-

(q) *Theatr. Botanicum* p. 737.

(r) *Linn. Amoen. A. ad.* p. 160.

LEPIDIUM CAULE REPENTE FOLIIS OVATIS AMPLEXI-CAULIBUS

Hall. helv. p. 546.

TAB. IV.

LONGISSIME radicularis varie ramosis, & filiformibus inter lapides repit hæc stirps, cujus bonam descriptionem primus dedit Joannes Jacobus Scheuchzerus (a), & nomen ei dedit *Thlaspi alpini*, folio rotundiore carnosio, flore purpurascente Tournefortii, nec Alpina hæc herba fugit egregium Barrelierum. *Thlaspi* etenim ejus montanum, serrato cepeæ folio, flore purpurascente umbellato (b) huc videtur referendum, uti etiam *Thlaspi subrotundo folio, utriculo gruinali* ejusdem (c) ex Halleri observatione (d), qui postremo eam descripsit, & novo instituto generi *Lepidii* accensuit.

Barrelieri icon cum minime bona sit, novam ponimus, cui & nostram descriptionem addimus, quod nonnulla etiam adjungenda habeamus.

Radix igitur, ut diximus, tenera & succosa longissime repens ei est, multiceps. Caules digitales sunt, aut vix ultra, fungosi, succosi, striati, simplices, incurvi. Folia ex radice aliquot elliptica petiolata, margine integerrimo, aut modice serrato; caulina sessilia sæpius triangularia, apice rotundo, cum alis duabus caulem amplectentibus: omnia crassa sunt, succosa. Umbella densa florifera; flores coloris dilute violacei; petala ex longis unguibus lineari-ovata; Flores, qui

D 2

me-

(a) *It. Alp.* 50.

(b) *Icon* 848 *obs.* 365.


(c) *Icon.* 1205. n. 11.

(d) *Clar. Jussieu* Synonymum esse credidit, bursæ pastoris, montanæ, globulariæ folio *Turn.* Hallernus autem ex siliula acuta figura ad *lepidium* revolvit.

medium umbellæ tenent seriores. Umbella, postquam flores deciderunt, spica fere evadit. Siliculæ sunt incurvæ, utrinque acutæ cum spinula; ex duobus valvis navicularibus componuntur. Semina habent utrinque duo, rarissime plura.

Crescit copiose in Monte Ceniso in saxosis jugi *Ronche* dicto; in summis jugis Alpium Valdensium etiam collegi.

Siliqua elliptica acuta in spinulam abeunte differt a *Thlaspi*, sed nonne inter *Draba*, aut *Alissi* species enumerari posset?



LY-

LYCHNIS FLORIBUS UMBELLATIS
 OCHROLEUCIS, PETALIS OVATIS,
 FILAMENTIS NIGRIS.

TAB. V. F. II.

RADIX huic Lychnidi est digitalis, pro plantæ modulo crassa, obscure albescens, fere lignosa, varieque intorta, cespites rosularum plures super terram extendens, quas componunt folia lingulata, sine plerumque elliptico-acuto prædita, & costa, seu sulco divisa, uncialis præter propter longitudinis. Inter folia oritur infirmus cauliculus digitum altus, nodosus, & ad nodos folia habens conjugata, caulemque amplectentia. Conjugationes tres, quatuorve sunt. Cauliculus rotundus est, & ejus summitati insidet florum umbella; ultimæ nempe foliorum conjugationes porrigunt pediculos, nunc simplices, nunc semitrifidos singulos gerentes florem luteo-pallidum, seu ochroleuci coloris. Petala quinque, plana, integra, non emarginata, sed oblongo-ovata unguibus longitudine calycis. Ad Limbi petalorum initium in quolibet petalo squammulæ duæ erectæ. Filamenta decem, quorum quinque corolla altiora erant; omnia vero ex receptaculo orta nullis cum unguibus adnatis, & nigri coloris, cujus coloris sunt etiam unguis petalorum. Apices staminum didymi, & e viridi cinerei, styli plerumque duo antheris longiores, corniculati. Calyx monophyllus, tubulatus, viridis, ore quinquefido, & fructus unilocularis. Prima folia radicalia vix hirsuta; caulina autem & caulis evidentius, omnium maxime calyx.

Rarus est in Lychnidum familia luteus color, sed plane nova, & omnino singularis hæc coloris compositio, ut minime

me dubitaverim ex floribus, & staminum colore specificum hujus *Lychnidis* nomen deducere.

Si attendas, benevole Lector, ad flores, & fructus partes, easque simul compares, videbis adesse in hac *Lychnide petala oblongo-ovata, integerrima, cum duobus denticulis ad limbi ortum, & cum calyce tubulato, fructuque uniloculari stylos duos, aut tres, stamina nulla unguibus jungi, & totam stirpem visciditate carere*; quæso igitur cuinam ex generibus *Lychnidum* a plerisque recentioribus constitutis inferenda erit.

Mei non est de Viris doctissimis, & in æternum colendis iudicium ferre; sed meam, si permittatur, opinionem adducere, dicam libere, quod mihi videtur, *Lychnidis* nimirum naturalissimum & in suis speciebus plane cohærens genus non esse in tot nova genera rescindendum, genera plantarum potius esse coercenda, quam amplificanda; neque comprobare scio investam apud rei herbariæ Scriptores consuetudinem, qua, ut cuilibet placet, & prout uniuscujusque sistemati commodum venit, species in genera eriguntur, nominibus aut novis excogitatis, aut, prout arridet, commutatis in maximam stirpium confusionem. Verum utique est *Lychnidis* amplissimum genus, tot speciebus onustum ultiores distinctiones exposcere. *Lychnidis* igitur familia in ordines diversos dividatur, prout tradendæ plantarum historiæ cuique videbitur opportunum, quæ distinctio tyrones quammaxime juvabit. Id præstitit optimo sane consilio in *Ranunculo ex. gr.* incomparabilis Vir Hermannus Boerhaavius, cujus exemplum secutus est Doctiss. Hallerus in *Veronica, Viola, Alsine, Gentiana, Pediculari, Allio* &c. aliique in aliis; sed ad ea, quæ restant de nostra *Lychnide* scribenda, deveniamus.

Locus natalis hujus plantæ est altissimum jugum *Affiette* inter *Exilliarum*, & *Fanestrellarum* arcem positum; legi etiam in parvo monte *Cenisio* & proximis jugis *Savine*, & *Jaillon*. Oritur insuper in magno monte *Cenisio* ad editas rupes Col

de

de la fenestra nuncupatas; quæ imminent vico la Ferriere:

A nemine auctorum, quos evolvere datum est, sermo de hac *Lychnide* habetur, nisi fortasse de hac intellexerit Bocconus, qui *mus. p. 2. p. 75. Tab. 63.* dicit Montis *Cenisii* incolam esse *Lychnidem rubram montanam, globulariæ capite, & facie*. Sed Bocconus suam ex Barreliero describit, qui eodem nomine (a) exhibet ic. 498. Uterque ex Fabio Columna (b) iconem ex integro mutuati sunt, ut verisimile sit nec Barrelierum, nec Bocconum memoratam Columnæ stirpem vidisse, cum iconi, quam suffurati sunt, nihil descriptionis addiderint. Forfanne Bocconus nostram in monte *Cenisio* adnotavit, & ad superius dictam Columnæ retulit?

Quidquid sit certum est *globulariam, luteam, montanam Col. diversissimam* herbam esse, nec oriri in Monte *Cenisio*, quem attente, diligenterque plus una vice perlustravi.

Nomine *Lychnidis minimæ, pyrenaicæ umbelliferæ* Tourn. (c) extat nostra planta in herbario eximii Medici Taurinensis Laurentii Terranei; fuit is insignis anatomicus, & edidit de glandulis urethræ tractatum (d), præterea Botanicem coluit, & ejus causa in Alpes nostras multas fecit excursiones. Immatura, & acerba morte præreptus breves dies duxit vir longiori vita omnino dignus; mortuus enim est anno 1714. ætatis annum habens septimum supra trigessimum.

Quas in variis itineribus collegerat stirpes juxta Tournefortii methodum in herbarium redegit quatuordecim voluminibus in folio constans, quod herbas indigenas plures comprehen-

(a) Uti animadvertit Clar. Justizus obs. in Barrel. n. 659. *rubram pro lutea* scripsit Bocconus.

(b) *Globularia lutea montana, col. cephr. p. 1. p. 153.*

(c) Hallerus vocavit hanc *Lychnidem* Tourn., *Silenem floribus in capitulum congestis*, quæ tum a nostra hac, tum a *Lychnide globulariæ capite, & facie* Barrelieri, & Bocconi differens est.

(d) Laurentii Terranei de glandulis universim, & speciatim ad urethram virilem novis Taurinis 1709. 8.

hendit cum non paucis super eas observationibus. Optimi viri pretiosum hoc monumentum meum fecit meritissimus Terranei discipulus D. Massola celebris Taurinensis Medicus, cui ab auctore testamento fuerat relictum. Ex hoc herbario colligitur optimum hunc virum herbarum caussa peragratum esse *Montem Vesulum, Montem Cenisium, Alpes Bugellenses, Canapicienses, Stamadienses, Maurianenses, Augustæ Prætoriae, & Sabaudia, Montisferratum; Albigaunii, Garexii, & Taurinorum agrum.*



LY-

LYCHNIS ALPINA REPENS SAXATILIS, *qua*
BEHEN ALBUM VULGO, FOLIO
LATIUSCULO, ET BREVIORI Ponted.

Comp. 128. *eadem fl. purpurascente ej.*
ibidem.

T A B. V.

QUÆ nunc describenda venit *Lychnidis* species, ea sicuti mera *Behen albi vulgaris* varietas enunciat a doctissimo Hallero; sed reapse distincta species est, uti ex plantæ descriptione, aliisque animadversionibus evidenter ostendimus.

Habet hæc *Lychnis* cauliculos plures repentes, glabros, nodosos, varie distortos; qui ex una flexuosa radice exoriuntur: ad nodos ponuntur folia opposita bina, rotunda, modice acuminata, glauci sæpe coloris, pilis brevissimis evidenter ciliata. Cauliculi nunc simplices, nunc ramosi, rami ex alterutra ala prædeunt simplices longis intervallis; rami omnes sustinent unicum florem *Behen albi* floris omnino similem. Calyx inflatus magnus, ore quinque-dentato. Perala appendiculara, & in duas lacinias profunde secta. Hæ Laciniae nunc lineares sunt extremo bi-vel tri-dentato, alias ex angusto subrotunde finiunt limbi extremo levissime crenulato. Filamenta decem alternis brevioribus, & cum petalorum unguibus connatis, corollam superant paniculatim posita. Antheræ simplices viridiusculæ albis filamentis incumbunt. Styli tres primum corolla breviores; deinde antheris tabescentibus extra florem longissime producti. Fructus rotundo-conicus tribus valvis dehiscens, femina angulata, obscura copiose includens.

E

Na-

Nascitur copiose inter mobiles lapides ; quibus abundantissime Alpium scopuli ; frequentior est in Alpibus Valdensibus , quam in reliquis .

In ruderis altissimorum Montium *Baldi* , & in *Vette* reperit Doctissimus Vir Julius Pontedera . Nostram vero cum illa eandem esse omnino certus sum , eo quod certiore humanissime per litteras me fecerit laudatus celeberrimus Vir , ad quem olim nostræ *Lychnidis* specimen miseram .

Nunc ergo ad eas veniam tradendas differentias , quibus hæc *Lychnis* a *Behen albo* distinguatur ; si aliquod quidem argumentum ex loci natalis differentia peti potest , adnotabo in primis hanc nonnisi alpinam esse , & alpium editiora inhabitare , cum *Behen album vulgare* summas alpes non attingat . Ex alpibus in hortum translata nullam subit mutationem , & culturæ etiam renititur . *Behen album* vero , uti omnes norunt , ita se se propagat ut difficile etiam extirpari possit ; alia certiora discrimina planta ipsa suppeditat . *Lychnis* hæc constanter cauliculis repetat , nec se se erigit . Folia subrotunda sunt , & sæpe ciliata . Cauliculi , eorumque rami , qui singulares sunt , unico magno flore terminantur . *Behen albi vulgaris* folia , licet variæ interdum amplitudinis , numquam subrotunda evadunt , & ampliori basi caulibus adhærent . Caules erecti sunt , non repentes , & ex alis caulium postremis nati pediculi , simplices , aut semitrifidi , flores sustinentes , caules finiunt .

CAM-

CAMPANULA PLERUMQUE MULTICAULIS,
UNIFLORA; FOLIIS OVATIS, SESSILIBUS,
INTEGERRIMIS.

T A B. V.

QUÆ nunc describenda occurrit Campanula, montis *Cenisi* incola est, & signatim nascitur in editissimo jugo *ronche* dicto eodem loco, quo inventa est *Viola*, quam vocavi *foliis ovalibus, integerrimis, uniformibus, pedunculis caulinis*.

Longa filiformis radix pluribus ortum præstat cauliculis unciam altis, qui foliis stipantur alternatim nascentibus, sessilibus, ovatam amplam formam possidentibus. Quemlibet cauliculum flos unus finit pro plantæ ratione magnus, semiquinquefidus, patens, cujus Calyx in quinque longos dentes fectatur, & evidenter hirsutus est. Antheræ sunt longæ cum stilo adhuc longiore tricorni de more gentis. Tenera, & glabra in universum planta est. Folia in ambitu levissime, & subtilissime hirsuta.

Nihil de hac Campanula commemoratur apud Auctores Botánicos, nec Synonima invenio, quæ ad hanc esse referenda videantur. *Campanula caule uniflora* Linnæi (a) nulla ratione ad nostram referri potest. *Campanula alpina, minima, integro acuminato folio, flore albo* Pontederæ (b), & Seguierii (c) ut omittam floris colorem, differt evidentissime floribus in capitulum congestis.

E 1

CAM-

- [a] Fl. Lapp. n. 85. Tab. 9. fig. 5. 6.
- [b] Comp. p. 755.
- [c] Pl. Veron. p. 178.

CAMPANULA FOLIIS HISPIDIS, CAULE
UNIFLORO Hall. *helv.* p. 493.

T A B. VI.

NOVA minime est hæc *Campanula*, sed a præclarissimo Hallero in sua stirpium helveticarum enumeratione recensita, & descripta. Confido tamen acceptam Botanicis futuram ejus, quam hic sisto, descriptionem icone illustratam.

Folia linguiformia, acute terminata, læte virentia, pilis aspera, tertiam pollicis partem ad summum lata rosulam efficiunt, ex qua sæpe unus, interdum geminus, digitalis, aut minoris longitudinis oritur Cauliculus, plerumque levissime pilosus. Cauliculus nudus non est, sed uno alterove folio donatur, quod radicalibus simile in sua origine Caulem, amplectitur. Flos unicus, magnus, violaceus, in fauce potissimum lanuginosus, lacinijs habens quinque obtusas ad extra revolutas ad medium floris usque non pertingentes. Calycem folia quinque componunt lingulata hispida, & sinuosa, appendiculata cum appendicibus etiam hispidis, & sinuosis. Antheræ longissimæ sunt, compressæ, & inflexæ per brevissima filamenta cum squammis, seu valvis nectarii coalitæ: cum in hac campanula etiam quinque squammis violacei cum flore coloris embrio, seu ovarium tegatur, & comprehendatur. Stylus antheras longitudine superat, coloris primum albi, dein luteo-virescentis, stigma trifidum gerens cum segmentis revolutis, & corniculatis. Fructus immaturus dissectus tria locula exhibuit. Radix longa, filiformis est, flexilis, alba, ex qua sæpius una, aliquando plures foliorum rosulæ proficiuntur.

Neu-

Neutiquam silentio præteream villos, qui folia, & calycem hispidum reddunt, in prona foliorum parte, & eorum ambitu præcipue conspicuos esse, & retrorsum duci subtilem hoc pacto serraturam mentiendo, eandemque plane villorum, aut, si velis, spinularum dispositionem in calycis etiam foliis observari.

Pro locorum ratione firmiores, & densiores villi sunt, aut debiliores. Cauliculus etiam sua altitudine maximopere variat. In editissimis jugis, quæ perpetua fere nix obsidet, propter Cauliculi brevitatem acaulos apparet hæc Campanula. Altitudo, quæ icone monstratur, summa est.

Inhabitat summa Alpium juga amans nasci inter fractos lapides, & passim in omnibus fere Alpium, quas invisi, summitatibus inveni. Rara vero in Helvetia est (a).

Varietas flore albo in Monte *Cenisio* reperitur, ubi hæc mutatio frequens est; præter vulgatas, & ab aliis Auctoribus jam memoratas, singulares alias his in Alpibus observavi. *Alba* Corolla ex. g. nitent *Gentiana foliis amplexi - Caulibus, floris fauce barbata* Hall. enum. p. 473. *Gentiana Asclepiadis folio* Clus. pann. p. 280. *Gentiana Alpina, pumila verna, minor* Tourn. inst. 81. *Vulneraria rustica flore albo* Tour. Inst. 391. *Anonis Alpina humilior radice ampla, & dulci* Tourn. Inst. Tourn. 401. *Campanula Alpina urticæ folio minor, floribus reflexis, & unico ordine dispositis cæruleis* Poned. Comp. tab. 74. &c.

Vix a *Campanula foliis echii, floribus villosis* C. B. Prodr. p. 37. differre affirmat Doctissimus Hallerus, & memoratæ campanulæ meram varietatem esse dubitat, quoniam autem constanter uniflora est, nec unquam diversâ foliorum figura invenerim, eâ nempe, quæ ad folia *Campanulæ foliis echii* &c. accederet, puto diversam revera speciem consti-

(a) Vide Hall. l. c.

stituere, differentiam vero specificam præstant folia in nostra linguiformia acute terminata, in altera lingulata sine subrotundo denticulato. Scapus, aut Caulis in postrema multiflorus floribus pendulis; in prima flos semper unicus, & etiam major.

Commodum interea videtur præeunte Halleró (b) huc referre *Campanulam*, quam Tournefortius dicit *saxatilem echii folio*, *flore magno*.



CAM-

(b) *l. 17. 112.*

CAMPANULA HIRSUTA, FOLMS ELIPTICO-
LANCEOLATIS, RARO DENTICULATIS,
CAULE UNIFLORO.

T A B. VI.

CAulis in hac Campanula palmaris & ultra, erectus, filiformis, sat durus, ex dura radícula prodit, in quo alterne, & sine ordine nascuntur folia primo elliptica, deinde angustiora, & acuminata, omnia hirsuta, ex utraque parte strigosa, & raris obrusis dentibus prædita. Summus caulis, qui florem gerit unicum plerumque nutantem, glaber est, cum planta tota de cætero valde hirsuta sit. Calyx etiam glaber aut vix hirsutulus; Lacinia calycis capillares; flos Campanæ forma longus, ore obruso, & leviter quinquefido.

A reliquis Campanulis, quæ ad istam accedere videntur, satis bene, ut mihi videtur, distinguitur; etenim foliorum forma, & magnitudo per gradus immutantur, neque ima folia cordata sunt aut subrotunda. Omnia deinde sunt dense, & subtiliter hirsuta, atque strigosa, ut evidenter pateat diversam plane esse a *Campanula uniflora, foliis imis cordatis, serratis, superioribus integris, hirsutis* Hall. enum. helv. 495. cum qua aliquomodo convenire videtur.

Oritur in umbrosis ad radices Alpīs *Albergian* prope arcem *Fenestrellarum*.

AL-

ALLYSSUM FOLIIS PINNATIS;
MULTIFORMIBUS, FLORIBUS
RACEMOSIS, LUTEIS.

TAB. VII.

ENUNCIATA Allyssi species nova prorsus mihi visa est, & Boranicis invisa, in qua illud est peculiare, ut folia pinnata sint, formæque multiplicis.

Prima, seu radicalia bursæ Pastoris folia repræsentant, pinnata pinnis fere alternis confluentibus, atque dentatis; caulina vero pinnata sunt pinnis nunc integris, nunc lacinulatis. Caules sæpe plurimi, ramosi, confestim nascuntur ex una radice fibrosa albescente, tortuosi sunt, varie inflexi, & quandoque in solo lætiori inter se impliciti. Caulina folia alis duabus aucta caulem amplectuntur; & pinnas exhibent (*in primis*) semel vel bis lacinulatas: (*in secundariis*) integras absque laciniis. Pinnulæ etiam continuo angustiores fiunt in postremis capillares evadentes. Summitates caulium, & ramorum desinunt in florum racemum, quorum unusquisque capillari nititur petiolo. Flos cruciformis, petalis ovalibus non emarginatis. Stamina sex distita apicibus luteis ornata germen oblongum circumstant, quod evadit silicula ovata, turgida, quatuor aut sex obscuri coloris semina dissepimento affixa utrinque includens. Stylus in embryone germis longitudinem æquat, brevior deinde fit in silicula matura. Calyx est lutei coloris, quem efformant quatuor foliola elliptico-acuta cito cum flore caduca.

Nascitur abunde circa thermas Valderianas in saxosis, & pratis secus torrentem. Pro locorum varietate folia aut vix hirsuta, aut quam maxime, & strigosa.

PER-

PERSICARIA ALPINA FOLIO NIGRICANTE,
FLORIBUS ALBIS Bocc. *musf. p. 2. tab. 27.*

T A B. VIII.

IN pratis Cottiarum Alpium, & ad earum convalles infrequens non est Persicaria, de qua sermo instituitur. Ejusdem primus, ut puto, monuit Balthassar Campi Lucensis (a) iisdem locis repertam deinde recenset Bocconus, cujus Synonymum repetunt Rajus (b), & Tournefortius (c). Bocconiana porro icone bene planta non exprimitur, & Campi descriptio licet hanc esse commonstret, brevissima tamen est, & pauca complectitur. Novam ideo, & accuratam descriptionem cudere optimum duxi.

Ex una radice Caules multi nascuntur, cubitales, & sesquicubitales quaquaversum positi, fere procumbentes, flexuosi, virides, aut etiam rubri, cavi, & nodosi; ad nodos vaginæ plerumque refectæ oram ciliatam habentes, in adultis, & deflorentibus aridæ, folia vix petiolata, parum sinuosa in longum acumen sensim extenuata margine integerrimo, venosa, costa folium dirimente, læte virentia, subtus & in ora subtiliter incana.

Folia per fascies nascuntur, & cum iis scapi longi numerosissimos flores habentes; flores magni, albi profunde secti in sex, quinque, aut quatuor ovalia segmenta: stamina etiam numeravi incerto numero, octo, septem, aut etiam quinque; germen trigonum cum duobus, aut tribus stigmatibus, & has linguas seu florum, seu staminum (d) varietates icon demon-

F

strat,

(a) *Spicilegio Botanico di Baldassar, e Michele Campi. in Lucca 1669. 4.*

(b) *Suppl. hist. pl. p. 117.*

(c) *Inst. 518*

(d) Patet hinc ex numero staminum, aut petalorum specificas in *Persicaria* genere differentias crui non posse.

strat. Summe demum ramosa planta est foliis, ramis, floribus fascicularim nascentibus, & unam partem spectantibus.

Saporem habet tantisper amarum cum manifesta aciditate. In dysenteria quadam epidemica felici cum successu ejusdem decoctionem consuluit D. Bartholomæus Caccia quondam Botanices in Horto Medico Taurinensi Professor, cum Alpes herbarum legendarum caussa inviseret.

Discrimen, quo a cæteris distinguatur hæc *Perficaria*, præstare mihi videntur *folia integerrima subtus incana, & habitus universus per fascies ramosus, & floriger; demum floris insignis magnitudo*: confundi nequit cum *Perficaria folio subtus incano Râii (e)*, neque haberi veluti varietas *Perficariæ mitis maculosæ & non maculosæ* Tourn. In *prima* folia tomento sericeo dense obducuntur & flores plerumque quadrifidi, Hallero adnotante (*f*). In *secunda* spica longe rarior, flores multo minores, habitus totius plantæ strigosior, & præterea folia sæpe maculata, quarum macularum vestigium nunquam vidimus in nostra.

Dictis in *Perficariæ* hujus descriptione adde glandulas nectariferas ad unguem segmentorum positas deprehendi. Ex illarum præsentia erit hæc Linnæo *Fagopyri*, seu, ut ipse vocat, *Helxinis* species (*g*).

An

(e) *Syn. ed. 3. p. 145.*

(f) *Enum. p. 181.*

(g) *Gen. plants. 2. 392.*

An HELIANTHEMUM ALPINUM,
MIRTHIFOLIUM, HIRSUTUM

Hall. helv. 780.

T A B. IX.

RADIX lignosa, rubens, & crassa repens plures præbet caules erectos, minime ramosos, digiti, aut palmi altitudine, quibus folia per conjugationes adnascuntur elliptica, aut oblongo-elliptica, firma, dura, hirsuta, & subtus brevi tomento incana; ad quamlibet porro conjugationem bina juniora folia exeunt. Caules finiuntur quinque, aut sex floribus luteis in racemum positis, qui ex suis pedunculis pendent cum foliolo unicuique supposito. Flos calyx, fructus cum *Helianthemo vulgari* convenit. Cauliculi ex viridi rubent, & multa hirsutie teguntur.

Collegi hoc *Helianthemum* loco *Prätavan* dicto *Alpis Affiette*.

Foliis firmis superna parte valde hirsutis, nihil acuminatis, averfa tomentosis, caulibus erectis duris, & per conjugationes æqualiter foliosis, ea ratione, mea sententia, distinguitur, ut nec *Helianthemi vulgari*s varietas censei possit, nec ad *Helianthemum foliis ad terram congestis superne pilosis, inferne tomentosis* Halleri (a), aut ad *Helianthemum alpinum, vulgari simile, latioribus foliis* Seguierii (b), reduci, sed pro sui generis diversa *Helianthemi* specie considerari.

LEU-

(a) *Enum. fl. helv. p. 359.*

(b) *Pl. Veron. suppl. p. 193. Tab. VI. fig. I.*

LEUCOJUM ANGUSTIFOLIUM, ALPINUM, FLORE SULPHUREO.

H. R. Par.

TAB. IX.

IN saxosis, & apricis tummarum Alpium apud nos frequentissimæ stirpis primus meminit Dionysius Jonquet (a) cui nomen sequens imposuit, *Leucojum*, sive *Keiri Alpinum flore sulphureo odoratissimo*; ex Jonqueto Tournefortius in suis Institutionibus recensuit. Hallerus in enumeratione stirpium helveticarum eandem stirpem commemorans eam profert veluti varietatem *Leucoii Sylvestris*, & ego etiam pro variis locis, quibus nascitur, *Leucojum nostrum Alpinum* multum differre observavi, caulibus aut vix digitalibus, aut spithameis iisdemque aut multum, aut parum foliosis, foliis demum vel ellipticis, vel linearibus, denticulatis, aut integerrimis ad *Leucojum silvestre Clusii* quammaxime accedendo. *Leucojum*, quod tabula nona sistit, abunde nascitur in monte *Cenisio*, in loco *Ronche* dicto, & ibi duas ejusdem stirpis varietates observavi, quæ fig. 2., & 3. exhibentur.

Prima quidem folia habet radicalia, longe petiolata lineariter elliptico sine; folia caulina, non petiolata, linearia; flores in umbella magni, aurei, petalis cordatis parum emarginatis, unguibus albis. Calyx erectus. Filamenta sex unguium longitudine cum duobus brevioribus. Antheræ filamentis incumbentes hastatæ. Stylus brevis, stigma bifidum, sequitur siliqua pene quadrangularis, unciam longa. Semina compressa ovalia rufi coloris non marginata, utrinque in septo siliquam dirimente nidulantur. Secunda quam fig. 3. repræsentat, duplo al-

[a] *Flort.* p. 72.

altior est. Flores minores, & petala ovata, non emarginata habet. Folia insuper ima hastata sunt, non cochleata petiolo sensim lateacente, in ambitu dentata, dentibus semipinnata, sine acuto. Caules virides sunt in utraque non ramosi, nec flexuosi.

Ex filiqua constat hanc ad hesperidis genus revera pertinere; quoad Synonima, ubi a Botanicis decernatur varietas Leucoii Silvestris, legantur apud Hallerum (b).



AB-

[b] *Enum. helv. p. 564.*

ABROTANUM PUMILUM, FLORIBUS
MAGNIS, SESSILIBUS, RARIS,
LONGE SPICATIS.

TAB. X.

IN supercilio altissimi scopuli collis *La Croix* supra *Mirebouc* e saxorum rimis Abrotanum hoc fuit a nobis cum vitæ discrimine excerptum anno 1748. Augusti initio; quod nullibi deinceps occurrit.

Radicem habet nigram, exsuccam, varia capita fundentem, ex qua folia plura, & inter hæc digitalis caulis nascitur. Folia ex compresso petiolo nascuntur, ovato acuminatam circumferentia sua formam exhibent, pinnis iterum pinnatis composita. Pinnæ non exacte sæpe sibi respondent, sed fere alternatim positæ esse videntur; pinnulæ acutæ sunt, acuto uno, aut altero dente aliquando incisæ. Folia glabra sunt, & pinnæ a sex ad decem. Caulis striatus, & viridis, qui fere totus spica est florum sessilium alternatim positorum; sed qui unam partem præcipue spectare videntur: flores magni sunt, Lutei, calyce amplo squammoso comprehensi, vehementer odorati, & calycis squammæ ex viridi rubent, intus citrini coloris; receptaculum nudum. Folia paulo acutiora, & tenuius incisa sunt, quam tabula monstratur.

Ammannus (a) recenset Abrotanum quoddam a *Messerschmidio* collectum, & appellat *Abrotanum pumilum*, folio tenuissime laciniato, flosculis majoribus, odore tanacetii valido; qua nomenclatura licet nostrum designari videatur, res nihilominus in ambiguo esse debet, eo quod nulla vel icon, vel descriptio ultra nomen afferatur.

ANO-

(a) *Rar. Rust.* n. 203.

ANONIS INERMIS, GLABRA, VAGINIS
LANCEOLATIS CRISTATIS, PETIOLIS
LONGIS, UNIFLORIS.

T A B. X.

RADIX lignosa, dura, nigra originem pluribus præbet cauliculis teneris, qui varie flexuosi eriguntur ad digitalem, aut paulo ultra altitudinem, undique fere tecti stipulis foliorum aut novorum, aut exsuccatorum. Nihil spinosi, nihilque viscosi tenens levissimam tantummodo in caule hirsutiem exhibet. Stipulae cauli applicantur, & eum amplectuntur pro plantæ modulo sat amplæ, ad externum ambitum in cristæ formam incisæ angulo acuto, ex cujus sinu pediculus prodit tria folia conjungens, quæ ex acuto principio in ovatam amplam figuram sensim extenduntur. Quod intermedium est folium, reliquis est amplius: Folia vero omnia acute denticulata sunt. Ex summis foliorum alis tres, quatuorve flores, qui caulem altitudine superant, & singuli singulis suis pediculis innituntur. Calyx quinque lineares dentes producit. Flos pulcher amplus ex albo purpureus, cum vexillo satis amplo purpureo venis intensioris coloris virgato, qui similis est flori *Anonidis* quæ a Morifono (a) appellatur *Anonis purpurea, perennis, foliis latioribus, rotundioribus, profunde serratis*. Fructus maturus superat eam magnitudinem, quæ icone exhibetur, leviter villosus est, & semina sæpius quinque compressa, cordata cum hilo exciso continet, rufi coloris.

Eritne hæc *Anonis non spinosa, minor, italica* Barrelieri (b), quam citatus Auctor in Italia, Jussæus in Tarantasiæ sinibus invenit? aut *Anonis purpurea non spinosa minor* ejusdem Barrelieri.

(a) *Hist. oxon. p. 2. 170.*

(b) *lc. 394. obs. 831.*

relieri? (c). *Prima* pediculos foliorum habet breviores; folia etiam recedunt, si illud potissimum consideretur, quod naturali pingitur magnitudine; præterea stipularum alæ incisæ non sunt, majoremque efformant angulum, neque folia acute, & dense dentata sunt. Quod vero ad *alteram* pertinet, adverti cum nostra convenire quidem alis longis, & incisiss; sed folia breviora esse; verum cum flores deficiant in icone Barrelieri, & brevissima sit descriptio, nil certi statui potest. *Anonis* quidem *Alpina*, *pumila*, *glabra*, non *spinosa purpurea* Tour. (d) ad nostram probabiliter pertinebit.

In descensu montis *Cenisti* supra *Lanebourg*, deinde secus viam ad *Braman*; tum frequenter in claris & apricis silvis in vallibus *S. Martini*, & *Lucernensi* obvia mihi fuit.



AL-

(c) *le. 1106. obs. 831:*
(d) *last. 508.*

ALSINE UNIFLORA, ET GRANDIFLORA
FOLIIS ACUMINATIS, PETALIS
INTEGRIS.

T A B. X.

ALSINE, cujus descriptio tradenda venit, frequens est in summis Alpibus Montium editissimorum Vallium *Valdensium*, & montis *Cenisii*.

Radix, quæ perennis est, & repens, cespites format cauliculorum biuncialium, qui nunc simplices sunt, nunc varie ramosi. Cauliculi versus radicem valde foliosi, foliis ex adverso nascentibus; sed densissime. Cauliculorum magna pars pene nuda cum unam, aut duas ad summum habeat tantum foliorum conjugationes. Summus Cauliculus florem magnum producit pentapetalum cum bracteis integerrimis ovatis albis venosis. Calyx componitur ex quinque ovato acutis concavis amplis foliolis. Calyx diu persistit: florem sequitur fructus conicus, qui quinque dentibus aperitur, folia sunt linear-acuminata in rigidam spinulam abeuntia, aliquantulum hirsutula.

Ab *Alfine foliis sulcatis aculeatis, petiolis unifloris, petalis integris* Hall. (a) diversa est: in hac enim cauliculi duriores ramis, & foliis maxime divergentibus, folia ex luteo virent, firmiora sunt, glabra, ampliora, breviora, & minus acuminata. Calycis præterea folia in *Alfine Halleri* memorata sunt similia caulinis; in nostra sunt a caulinis diversa.

Nostra erit ne *Myosatis tenuissimo folio rigido* Tournefortii?

G

PE-

(a) Enum helv. p. 388.

PEDICULARIS FOLIIS BIS PINNATIS,
CALYCE NON CRISTATO, FLORIBUS
OCHROLEUCIS IN SPICAM
NUDAM CONGESTIS.

T A B. XI.

CAULIBUS se se erigit hæc Pedicularis palmaribus, aut paulo altioribus, rotundis, striatis, obscuri coloris, intus cavis. Folia habet duplicato-pinnata nervo non folioso, & tenuia. Longe elliptico-acuminatam formam habent folia, quæ constituunt pinnæ viginti, & ultra, postremis confluentibus. Pinnulæ iterum pinnatæ sunt pinnis sex aut septem, atque hæ secundæ pinnulæ sunt acuti longi dentes, nunc simplices, nunc ramosi. Prima folia longe petiolata sunt, secunda sessilia; omnia juxta caulem ascendentia. Sub spica plura adsunt fere in orbem posita. Spica caulem terminans floribus componitur, quibus galea non est omnino obtusa, cum tubo sat longo, hiato parvo. Lutei, aut ochroleuci coloris sunt: cuilibet flori subjicitur foliolum nonnisi deductis floribus fere visibile. Calyx floris tubulatus est tantisper inflatus, ore inæqualiter quinquentato. Tota planta villis quibusdam albis ornatur.

Valde similis est *pediculari foliis alternis, pinnis pinnatis, floribus ex spica florigera longe eminentibus* Halleri (a) potissimum foliis, quæ similiter omnino inciduntur; sed nostra caules habet duplo certe quoad crassitiem minores, folia obscuriora, nec subtus pallent; nulla folia spica longe emittit, itaut pro diversa considerari possit, nisi fortasse *memorata* Halleri variet, nec constantissime habeat spicam, uti icone Halleriana exhibetur, *foliosam*.

Nascitur abunde in pratis alpinis a montibus *Fenestrellarum* usque ad montem *Cenisium* inclusive.

PE-

(a) P. 623. T. 17. f. 2.

31

PEDICULARIS FOLIIS ALTERNIS , PINNIS
SEMIPINNATIS, FLORIBUS ROSTRATIS
OCHROLEUCIS DENSE SPICATIS.

TAB. XI.

RADICEM hujus pedicularis formant plures oblongi bulbuli, ex quibus pedalis prodit caulis rotundus, primum rubens, dein virens. Folia ex radice pauca petiolata, circumscriptione oblongo-elliptica, pinnata pinnis 18. ad 20.: pinnæ dentibus alte, & acute excisis semipinnatæ sunt. Caulina folia alterna, rara, & similia radicalibus; sed superiora sessilia, non petiolata. In summo caule spica florum, quorum galea rostrata est rostro acuto, barba integris tribus segmentis divisa, medio segmento minore. Calyx quinque-dentatus, non cristatus. Fructus ovato-turbinatus, compressus. Floribus folia non interponuntur, flores sessiles sunt.

Habitat in pratis summis editissimi, prope *Annecium*, in Sabaudia montis la *Tournette*. Radice, & foliorum forma parum, aut vix quidem diversa apparet ab ea, cui Hallerus (a) nomen instituit *Pedicularis alpinæ*, foliis alternis pinnatis, floribus ex atrorubentibus in spicam densam congestis, sed præter floris colorem repugnat forma galeæ, quæ in *Halleriana* obruta est.

G 1

PE-

(a) *Enum. helv. T. 16. f. 2.*

PEDICULARIS PINNIS FOLIORUM ACUTE
PINNATIS, FLORIBUS OBTUSIS,
PURPUREIS, SPICATIS,

TAB. XII.

RADIX lignosa, nigra, ex qua varia capita, & veluti cespites foliorum; folia longe petiolata, petiolo compresso, & intus excavato, biuncialis, & ultra longitudinis. Pinnata sunt pinnulis uno, altero, vel etiam tribus dentibus acute, & profunde incis; pinnæ vero 12. ad 14. Inter hæc cauliculus rotundo-striatus, firmus erigitur, qui sustinet spicam uncialem. Spica formatur ex floribus, foliolis dense interpositis. Calyx floris ore est quinque-fido, segmentis capillaribus, brevibus, multum lanuginosus; unde spica fit incana, & lanuginosa. Caulis, folia, & eorum pediculi potissimum splendide nigrescunt; & ad caput radices squammæ plurimæ, seu reliquæ foliorum emortuorum. Folia in caule rara, & brevi, raroque villo tum caulis, tum foliorum pediculi decorantur. Flores prælongo tubo e Calyce exeunt galea obtusa, & alata: obsolete purpurei coloris sunt; galea intensius colorata; barba floris trifida est ut in cæteris pedicularibus.

Frequens est in summis nivosis jugis montis *Cenisii*, & alpium *Jaillon*, & le *Vallon*; prope deliquescentem nivem in scopulosis habitat.

Puto hanc pedicularim eandem esse cum ea, quæ (a) ab Ammanno nominatur *pedicularis humilior*, foliis tenuissime divis, floribus spicatis purpureis. Suadent rem ita esse notæ in hujus descriptione traditæ, neque locus natalis repugnat. Quamvis Ammanni pedicularim Gmelinus collegerit in sylvis inter *Jervynien-*

(a) *Rar. Rusb. p. 32.*

53
 vviense, & Tschütiniense munimentum ut & ad Ingodam, & Schilkam fluvios in Dauria; quis ignorat herbas alpinas in Septentrione pratenses, & campestres etiam fieri? *Plantæ alpinae calidarum regionum in septentrionalibus pratenses sunt*, inquit Gmelinus (b), & Linnæus (c) observat in *Oelandia campestri* spontaneum esse *Astragalum Pyrenaicum non ramosum, barbæ jovis folio, flore ochroleuco glomerato* (Tourn.) Scheuchzeri (d), qui apud nos, & in Helvetia semper alpinus est. De eodem Astragalo illud etiam adnotavi, quod in alpidibus Valdensibus nonnisi in summis jugis sit reperiendus inter postremas stirpes; in monte *Cenisio* autem, qui septentrionalior est, & in quo frigus longe majus, abunde nascatur in pratis planitie montis *Cenisii*, quæ observatio eodem in loco de aliis etiam stirpibus institui potest.



PE-

(b) *Præf. ad fl. sib. cxiv.*

(c) *Flor. Svec. p. 214.*

(d) *It. Alp. 14. p. 330. cum icon.*

PEDICULARIS FOLIIS ALTERNIS, PINNIS
SEMIPINNALIS, FLORIBUS LAXE,
ET LONGISSIME SPICATIS.


TAB. XII.

POSTREMA hoc libello exhibenda stirps est minus nota quædam pedicularis, qua nil frequentius est nostris ubique in pratis alpinis, tum & in summis nivosis jugis.

Hæc radices possidet lignosas, filiformes, quæ uno capite colliguntur, ex quo nunc unus, nunc duo exeunt caules cubitales in altioribus speciminibus. Rotundi sunt, firmi, glabri, striati, & rubro-nigricantes. Folia ex radice pauca longe petiolata, pinnata pinnis viginti, & ultra cum ultimis confluentibus; pinnæ ad medium usque secantur dentibus acutis in spinulam fere abeuntibus; dentes isti aliquando, sed raro iterum novo dente inciduntur. Folia caulina radicalia omnino referunt; alterne sita, & rara. Postrema folia sessilia sunt. Flores in caule sessiles aliquo intervallo alterne siti laxam, & longam spicam efficiunt. Flores obscuri sunt, parvi, purpureo-rubentes galea obscuriore. Galea multum rostrata; labium inferius trifidum cum laciniis subrotundis, medio minori, & virgati coloris purpurei. Calyx profunde quinquefidus. & lanuginosus; univrsa imo Caulis portio florifera est lanuginosa; folia floralia sunt pinnato-dentata, & singulis floribus unum subjicitur.

Pedicularis alpina *foliis alternis pinnatis, floribus atro-rubentibus in spicam densam congestis* Halleri (a) diversa ab enunciata est, floribus minime rostratis & in densam spicam congestis.

stis. Pedicularis nostra superius deſcripta (b), tum eadem⁵⁵
 ob rationes, tum propter floris colorem etiam ab hac ultima
 diſtinguenda. Erit ne *Pedicularis alpina purpurea*, ſtrigoſior,
ſpica oblonga, incana, floribus alternatis, & per intervalla poſi-
 tis Burſ. (c) 2. Nomen certo ex integro congruit,



(b) V. Tab. xi. f. 2.

(c) V. Lin. Amoen. Acad. p. 153.

IMPRIMATUR:
Provicarius S. Officii Taurini.

V. Antonius Rezia P., & R.

V. Se ne permette la Stampa
Di Quaregna per la Gran Cancelleria.

petiolatis,
innatis.

Alyssum pyrenaicum perenne minimum
foliis trifidis. Toura.

Tab. I.




Fig. 1.

Abies alpinum candum
humile. C. B. Pr. 71.



Achillea foliis integris, odoratis, urnetformibus, in apice dentatis.

Tab. II.

*lea foliis pinnatis, lanugine tota
ctis floribus albis umbellatis. Hall.*



==

dum erectum ramosum, foliis planis, floribus albis
longe pedunculatis.

Tab. III.




Fig. 4.

*Viola scabro foliis uniformibus,
ovalibus integerrimis.*



e dense







A



B



C



D



E





Tab. VII.



107 107

Tab. VIII.



111


Fig. 1.

Tab. VIII.

Ipomoea mirabilifolia *hirsutum*, Hall.



PLATE V



Scorus Regalory Scul.

20. Xir





